

Aruba ta forma parti di proyecto di mapanan di calor financia pa UNESCO

Recientemente a anuncia e lansamento oficial di e proyecto di Mapanan di Calor traha na medida pa Estadonan di Isla den Caribe financia pa UNESCO, cual ta un iniciativa pionero cu ta trece datonan critico y accesibel di clima pa e comunidnan insular mas vulnerabel.

Den un entrevista cu Oriana Wouters, un di e presentado di e proyecto aki, el a splica cu e meta general ta pa mehora planificacion di espacio por medio di uso di e mapanan cu ta muestra con temperatura ta distribui rond di islanan.

Esaki ta loke nan ta yama un herment pa resiliencia climatico, y adicionalmente e ta un forma pa empodera islanan Caribense y su comunidnan pa tin acceso na e data aki.

Generalmente, ta lesa rapportnan internacional cu ta indica cu Caribe ta un di e areanan mas vulnerabel pa impacto climatico y un di e problemanan cu mayoria di isla Caribense tin ta e falta di data. E di dos problema ta e acceso na data—esey no ta disponibel.

Mayoria convenio internacional cu ta regarda clima y tambe varios maneho cu ta ser ricibi den islanan Caribense ta indica cu ta e ciudadanonan of habitantenan esun cu mester ta capaz di implementa metanan nacional por medio di actividadnan cu ta mehora resiliencia contra clima.

Wouters a splica cu nan idea di e proyecto aki haci conhuntamente cu Muskaan



Khemani di Corsou a bin for di Caribbean Climate Justice Leaders Academy aña pasa, y nan dos a ser selecta di un grupo basta grandi di participantenan na unda nan a keda den e top 10 pa asisti na e conferencia di partidonan di cambio di clima na Dubai.

“Eynan a mi cu Muskaan a cuminsa papia over con nos por empodera nos comunidnan y Muskaan, cu ta un Research Data Analyst, tabatin e capacidad caba pa haci e tipo di estudio aki, pero e no tabata sa con pa implemente pasobra e no ta biba na Corsou, e ta biba na Boston, Merca. E ora ey mi a bis’e cu mi ta conoce un fondo di UNESCO y lo keda pending di e call. Na december e call tabata habri y e ora ey nos a aplica y cuminsa traha riba e proyecto aki,” Wouters a menciona.

Na prome instante, UNESCO—cual Wouters tabata desea pa ta un proyecto cu ta inclui mas paisnan Cari-

bense—tabata un proyecto regional, pero nan a haya e recomendacion pa cuminsa cu un proyecto nacional.

“Pero no tabatin ni un forma cu mi por haci’e solamente pa Aruba, pasobra e data scientist cu ta analisa e mapanan cu nos lo baha di imagenan satelite y lo ser analisa pa temperatura, e ta bin di Corsou, dus automaticamente Corsou mester ta den e proyecto. Eynan nan a compronde y nan a bisa cu mi por inclui mas isla y nan a percura pa nos tin sosten di e comisionnan nacional di islanan di Sint Maarten y Jamaica tambe. Nos ta cuatro isla cu ta involucra cu e proyecto aki,” el a expresa.

Na e momentonan aki, nan ta den e fase di crea materialnan di comunicacion y branding, unda nan ta wardando pa e lista di contacto di e otro islanan involucra. Na Aruba ta inclui departamentonan di gobierno y tambe varios NGO cu ta den sector di

deporte, clima, naturalesa y medio ambiente, educacion, entre otro.

“Tur esakinan ta importante pa nos por consulta na comienso di e proyecto y asina ey nos ta sigur di e gruponan cu nos ta bay scoge como esnan vulnerabel cu lo ser entrevista pa incorpora e entrestanan den e mapanan cu ta demostra distribucion di calor na e islanan,” Wouters a señala.

Na final di e proyecto, e mapanan aki ta bay ta poni den un data base pa e cuatro isla unda cu cualkier persona lo tin acceso pa baha nan y ademas ta un metodo cu ta automatiza. “E ora ey, cualkier persona y seguramente esnan cu ta haci maneho den paisnan, por consulta e mapanan pa mehora e planificacion y inversion di desaroyo.”

E otro parti ta pa crea e code pa yega na automatizacion y nan lo traha un rapport digital cu lo ta disponibel online. Ademas nan ta bay organisa un tayer virtual na augustus di otro aña e cual por conta cu participacion di participantenan di otro islanan por ehemplo Guyana, Barbados, Trinidad & Tobago y e ora ey nan mes por siña con pa traha cu e code, con pa interpreta e mapanan y asina ey ta dunando otro e capacidad y herment pa nan por haci nan propio analisis y aplik’e den nan pais.

Tambe lo tin un evento riba tur cuatro isla na final di e proyecto e cual ta na september y october di otro aña unda lo invita comunidad pa mira e mapanan y tambe siña cu por us’e den planificacion y inversion.

Na e momentonan aki, na Aruba tin e tendencia di rosa tur cos y ta usa infraestructura cu kisas e no ta crea e miho “cooling option” y no ta resiliente—resiliente den sentido cu edificionan por wanta un horcan por ehemplo, pero segun Wouters a sigura e no ta resiliente pasobra no tin isolacion y esaki ta haci cu costo di energia ta subi.

Otro aspecto ta cu e por yuda esun cu ta planifica pa guia si ta inclui mas infraestructura berde, arbol, boske, etc, riba e tereno. Nan ta bay entrevista esnan cu ta tuma bus pa asina mira con e hendenan aki cu ta tuma bus por cana entre 20 pa 45 minuut pa yega na un bushalte y con nan mes ta percibi calor, kico nan ta sinti, ki ta e necesidad cu mester ser adresa relacionando nan experiencia. Esey por ser usa den planificacion di ROP of ROPV.

Otro grupo vulnerabel cu nan a scoge pa entrevistanan ta muchanan y hobennan di scolnan pa asina tin nan diferente perspectiva, esnan cu ta tuma bus, turista y hende grandi.

El a trece dilanti cu si por ehemplo ta un scol basico, por dicidi di en bes di basha asfalt, e data ta muestra cu no por sigui basha asfalt riba su tereno y tin cu tuma otro medida pa asina ey e ta mas agradabel ora muchanan ta pafo den pauze of den oranan cu nan tin les.

“Esey ta e manera cu nos kier empodera e comunidad di e islanan cu e proyecto aki,” el a finalisa.

